

**Gipabangon sa Dios si Debora isip Maghuhukom sa Israel  
ug Inahan sa Israel nga Nagbatasan sa Pagpasakop sa Babaye sa Lalaki  
aron Mamintinar ang Gitudlo sa Dios  
ug Madala ang Tibuok Israel sa Hustong Han-ay  
diha sa Pagkahari ug Pagkaulo sa Dios**

Basahong Kasulatan: Huk. 4—5

- I. Gipakita sa basahon sa Mga Maghuhukom nga nakapasilo sa Dios ang Israel sa pagsalikway nila Kaniya nga ilang Hari; dakong pagkadaotan gyod sa panan-aw sa Dios kon isalikway nato Siya nga atong Hari, Ginoo, Ulo, ug Bana—1 Sam. 8:7; 12:17, 19; Huk. 21:25; 17:6; Luc. 19:11-14; Jer. 11:13; Ezeq. 16:24:**
- A. Mapadayonon gyod natong himoon, sination, ug pahimuslan si Cristo nga atong Hari, Ginoo, Ulo, ug Bana aron mahimo Siyang panalangin nato nga maghimo natong palatayanan sa panalangin ngadto sa mga balaan ug sa tanang iglesia—Mat. 2:2; Juan 1:49; Heb. 7:2; Isa. 32:1-2; 33:22; Fil. 2:9-11; Rom. 14:6-9; 2 Cor. 4:5; Col. 2:19; Efe. 1:22-23; 2 Cor. 11:2-3; Os. 2:19-20; Num. 6:23-27; Sal. 128:5; 48:2.
- B. Gihisgotan sa Mateo 1:1 si Cristo nga “ang anak ni David, ang anak ni Abraham”:
1. Kay mga masupilon man ta, maghinulsol gyod ta ug modawat ni Cristo nga anak ni David, sa ato pa, ingon nga pagbulot-an, Magbubuot ug Hari nato, aron magbuot Siya sa sulod nato ug ibabaw nato diha sa gingharian sa Dios.
  2. Kon naa na nato si Cristo ingon nga anak ni David, ang labaw pa nga Salomon, maanaa sab Siya nato ingon nga anak ni Abraham, ang tinuod nga Isaac; nagpasabot kini nga labi natong himoon si Cristo nga Hari (ang anak ni David) nato, labi sab tang maanaa sa Iyang pagbuot, ug labi tang maanaa sa Iyang pagbuot, labi sab tang makapahimulos Niya nga panalangin (ang anak ni Abraham) nato; kini ang panalangin sa nahikay nga Tulo-usang Dios nga nahingpit isip malangkobon-sa-tanan nga Espiritu—v. 1; Gal. 3:14, 16, 29.
  3. Maghimo kini natong mga palatayanan sa panalangin alang sa pag-uswag sa mga balaan (pagtubo nila sa kinabuhi) ug sa ilang kalipay sa pagtuo (pagpahimulos nila ni Cristo); gitawag ta aron mopanalangin sa uban, busa kita, nga katawhang gipanalanginan, kanunay gyong mopanalangin sa uban aron mapanunod nato ang panalangin—Fil. 1:25; 1 Ped. 3:9.
- II. Gipabangon sa Dios si Debora isip maghuhukom sa Israel nga nagbatasan sa pagpasakop sa babaye sa lalaki aron mamintinar ang gitudlo sa Dios ug madala ang tibuok Israel sa hustong han-ay diha sa pagkahari ug pagkaulo sa Dios—Huk. 4—5:**
- A. Gibuhat na sab sa mga anak sa Israel ang daotan sa panan-aw ni Jehova sa namatay na si Ehud (4:1), busa gibaligya ni Jehova ang Israel sa kamot ni Jabin nga hari sa Canaan, nga ang kapitan sa iyang kasundalohan mao si Sisera; duna siyay siyam ka gatos ka karong puthaw, ug gidaugdaog gyod niya pag-ayo ang Israel sa kawhaan ka tuig—vv. 2, 3.
- B. Sa panahon sa Mga Maghuhukom 4, wala makatuman ang mga lalaki sa Israel sa gitudlo-sa-Dios nga kagamitan nila sa pagpanguna; nagpugos kini sa Dios sa pagbuhat og talagsaon kaayong butang sa pagpabangon og babaye, ni Debora,

isip maghuhukom sa Israel; nag-usab sa tibuok kahimtang sa Israel ang pag-pabangon nianang bayhana—vv. 4-5.

- C. Nituwaw ang mga anak sa Israel ni Jehova (v. 3), ug gipabangon si Debora, nga babayeng propeta, isip maghuhukom sa Israel; maglingkoran siya ilalom sa kahoyng palmera ni Debora, ug manungas ang mga anak sa Israel ngadto niya aron magpahukom (vv. 4-5).
- D. Sa Biblia nagpasabot og tawong nagpasakop sa Dios, tawong nagtuman sa gitudlo sa Dios, ang tarong nga babaye; kini gyod unta ang posisyon nga gibarogan sa Israel atubangan sa Dios ingon nga iyang Hari, Ginoo, Ulo, ug Bana, apan gilapas sa Israel ang gitudlo sa Dios, gibiyaan ang posisyon niya isip asawa sa Dios ug gisalikway Siya tungod sa gatosan ka diosdios; tungod niini nidangat ang Israel sa makaluluoyng sitwasyon ug kahimtang:
1. Nasareo si Samson sukad sa tagoangkan sa iyang inahan sa tibuok niyang kinabuhi; patas-on sa Nasareo ang iyang buhok, nga nagtimaan nga magpabilin siyang magpasakop sa pagkaulo sa Ginoo, nga niana naa ang gahom—Num. 6:5; Huk. 16:17; 1 Cor. 11:3-6, 10, 15.
  2. Apan gipugos siya ni Delila adlaw-adlaw pinaagi sa iyang mga pulong ug giapura siya nga isulti kaniya ang sekreto sa iyang gahom hangtod “gikapoy pag-ayo ang iyang kalag” (Huk. 16:16); tungod sa makapaluyang mga taktika ni Satanas, nabitik niya si Samson, gikiskisan ni Delila ang iyang buhok, ug gibihag siya sa mga Filistehanon, nawad-an sa iyang paghalad ingon nga Nasareo, sa iyang gahom, sa iyang panghimatuod sa pagkabalaan, ug sa presensya sa Dios (Dan. 7:25).
  3. Ang mga modawat sa naglahi ug sayop nga pagtulon-an nga dili angay magpasakop ang mga magtutuo sa tinugyanang mga pagbulot-an nga gitudlo sa Dios madaot gyod tungod ning pagtulon-ana; alang nato (ilabi na sa minyong mga sister—Efe. 5:22-24), duna gyod unta tay mapasakopong espiritu, baroganan, kahimtangan, ug tuyog; kon ingon niana ka nga tawo, duna unyay dakong panalangin alang nimo ug sa imong kaugmaon.
- E. Sa pagbasa nato sa awit ni Debora sa Mga Maghuhukom 5, makita nato nga daghan kaayo siyag kahimoan, kapasidad, sulodnong pagpanabot, ug panlantaw sa unahan, apan mapasakopon kaayo kanang maayo kaayo ug makahimong babaye; gihimo siya sa Dios nga lider, apan gimintinar niya ang hustong han-ay ug gihimo si Barak nga iyang pandong—4:6-9; itandi sa 1 Cor. 11:3-6, 10.
- F. Nakaamgo si Debora nga nagkinahanglan siyag lalaki nga mahimong iyang pandong; sama sa giingon ni Pablo sa 1 Corinto 11:3: “Si Cristo ang ulo sa tagsatagsa ka lalaki, ug ang lalaki maoy ulo sa babaye, ug ang Dios maoy ulo ni Cristo.”
- G. Sa dihang nanguna kining maayo kaayo, talagsaon kaayong babaye sa pagbatasan sa pagpasakop sa babaye sa lalaki, nahusay pag-ayo ang tibuok nasod; nanguna ang tanang lider, nisunod ang tanang tawo, ug naporma ang kasundalohan; nibalik ang tanang tawo sa ilang hustong posisyon atubangan ni Jehova.
- H. Busa, makaingon si Debora sa iyang awit, “Nga nag-una ang mga lider sa Israel, / Nga kinabubut-ong naghalad sa ilang kaugalingon ang katawhan, / Dayga si Jehova.... / Ug nanglugsong ang salin sa mga halangdon; / Nanglugsong ang katawhan ni Jehova uban nako batok sa mga kusgan”—Huk. 5:2, 13.
- I. Ang una ug kinadak-ang kagamitan sa mga sister sa iglesia mao ang pagpasakop; kon makat-on ang mga sister niini, magmakusganon, madato, ug mabag-o ang iglesia:
1. Nagkinahanglan sa sangkap sa kinabuhi, pagpahimulos sa grasya, pagbuhat sa krus, ug pagdumili sa kaugalingon ang pagpasakop.

2. Mapasakopon kaayo ang mga napuno og Cristo; gihatagan na ta sa Ginoo, nga mapasakopon sa tibuok Niyang kinabuhi, sa Iyang kinabuhi sa pagpasakop ug pagsugot—Fil. 2:5-11; Heb. 5:7-9.
3. Kanang makigminyo ang sister sa usa ka brother nagpasabot man nga andam mohalad sa iyang kaugalingon ang sister ug moingon nga, “Andam kong magpasakop”; kon wala gyoy tinguha ang sister sa iyang kasingkasing nga mopasakop sa tawong gusto niyang minyoan, dili siya angay maasawa nianang tawhana ug dili angay makigminyo niya—Efe. 5:22-23; 1 Ped. 3:1-6.

### **III. Nibangon si Debora dili lang ingon nga maghuhukom sa Israel kondili ingon nga inahan sab sa Israel—Huk. 5:7:**

- A. Praktikal na nganing moabot sa kinahabogan ang iglesiahanong kinabuhi, duna gyoy pila ka tinuod nga inahan sa matag iglesia; niingon si Pablo sa Roma 16:13 nga, “Pangumustaha si Rufo, nga pinili diha sa Ginoo, ug ang iyang inahan nga akoa sab”:
  1. Nagkinahanglag inahan si apostol Pablo; kon walay sister nga mangatiman nila ingog inahan, magmasulob-on gyod ang tanang naluwanan sa pag-alagad sa Ginoo; nagkinahanglan tang tanan sa pag-atiman sa espirituhanong mga inahan, kansang pagpangatiman maoy tinuod nga til-og ug panalipod nato.
  2. Kanang naay espirituhanong inahan si Pablo nagpakita man nga dunay pagbalhin sa kinabuhi ang mga balaan sa iglesiahanong kinabuhi sa Roma pinaagi sa pagkalansang sa krus ug pagkabanhaw ni Cristo; ang labing maayong paagi nga maanaay pagbalhin sa kinabuhi pagsunod man sa sumbanan ni Pablo, nga wala gyoy tuyo nga masayod sa bisan unsang butang kondili sa malangkobon-sa-tanan nga Cristo ra, ug kini Siya nga gilansang sa krus—1 Cor. 2:2.
- B. Ang Ebanghelyo sa Juan basahon sa kinabuhi, dili sa natural nga kinabuhi kondili sa nabalhin ug natranspormang kinabuhi; sa sinugdan, dili anak ni Maria si Juan, ug dili inahan ni Juan si Maria, apan tungod sa kamatayon ni Cristo nga nagpagula-sa-kinabuhi, sa Iyang pagkabanhaw nga nagpaambit-sa-kinabuhi, ug sa pagkausa Niya kanila sa kinabuhi, mausa Niya ang Iyang hinigugmang tinun-an ug mahimong anak sa Iyang inahan, ug mahimo siyang inahan sa Iyang hinigugmang tinun-an—19:26-27.
- C. Naa sa unod ang unang relasyon nato, apan naa sa espiritu ang ikaduha, sa ato pa, naa sa nabalhin nga kinabuhi; kay naa man tay ikaduhang pagkahimugso (3:6), naa gyod tay ikaduhang relasyon, ang ikaduhang relasyon sa pamilya nga dunay tinuod nga mga igsoong babaye ug tinuod nga mga inahan.
- D. Kon gamiton sa mga sister ang ilang espiritu sa pag-ampo ug pagtuo aron mahimong tinuod nga mga inahan (2 Cor. 4:13), makaamgo sila unsa sila kadalo ug unsa sila kaanaa sa ilang kaugalingon; hingpit nga mobutyag nila ang pagbaton og buotang mga anak diha sa espiritu; labot pa, motubo ug mohamtong sa kinabuhi ang mga sister sa pag-atiman nilag pila ka espirituhanong anak.
- E. Kon nahigugma sa Ginoo ang mga sister ug tinuod gyong alang sa iglesiahanong kinabuhi diha sa pahiuli sa Ginoo, isipon gyod nila ang ilang kaugalingon nga mga nars nga maalagaron, mga nars sa iglesia, nga nangatiman sa iglesia isip tinuod nga ospital; maalagarong mga sister gyod unta ang tanang sister pinaagi sa pag-ampo ug mahigugmaong mga inahan pinaagi sa labing maayong paagi sa gugma aron motabang sa mga igsoong naa sa kawalad-on ug sa mga batan-ong igsoon sa espirituhanon ug iglesiahanong kinabuhi nila; kini ang labing maayong paagi nga mapanalanginan, motubo, maespirituhanon, ug tinuod nga makapahimulos sa Ginoo—Rom. 16:1-2, 13; Isa. 66:12-13; 1 Cor. 12:31; 13:4-7.

**IV. Niingon ang Biblia nga niadtong panahona diha sa katawhan sa Dios, dunay “hugot gyod nga mga pagbuot sa kasingkasing,” ug dunay “dagkong pagsusi sa kasingkasing”—Huk. 5:15-16:**

- A. Ang pagkaanaay hugot gyong pagbuot paghimo mag lig-ong desisyon, ug ang pagkaanaay dakong pagsusi pagplano man nga magkinabuhi ngadto sa Ginoo ug ikinabuhi ang Ginoo alang sa takdo-sa-panahon nga pagpahiuli Niya sa pagtukod sa Iyang Lawas, pag-andam sa Iyang pangasaw-onon, ug pagpadangat sa Iyang gingharian sa pagpadayag niini—2 Cor. 5:14-15; Rom. 14:7-9; Bug. 19:7-9.
- B. Sa dihang gidaugdaog si Brother Lee sa mga sundalong polis sa mga Hapon sa 1943, gipadamgo siya sa Ginoo nga niini nakita niya ang pagbanagbanag sa adlaw, sama sa pagbanagbanag sa buntag, ug dunay lapad nga dalan, nga masanagon kaayo, tul-id kaayo, ug walay kinutoban; kini ang lapad nga dalan, ang nisubang nga Adlaw, ug ang walay kinutobang kaugmaon sa pahiuli sa Ginoo—itandi sa Prov. 4:18.
- C. Mangandoy ug mag-ampo gyod ta sama sa mga tawong gihulagway ni Debora sa kataposan sa iyang awit, nga mahimayaong natapos sa: “Masama unta sa Adlaw kadtong nahigugma Niya / Inigsubang niini sa kakusog niini”—Huk. 5:31:
  - 1. Kanang mosubang ang Adlaw sa kakusog niini nagpasabot nga masanagon, masilakon, ug mahimayaon kining mohayag; kon buot makasinati ang tanang iglesia sa hugot nga mga pagbuot, mga pagsusi, ug pagsubang aron mosidlak sama sa Adlaw, magpahimulos gyod sila sa Ginoo ingon nga ilang kadaogan.
  - 2. Ang mga mananaog nga naumol pag-usab sa nag-ayong Cristo ingon nga Adlaw sa pagkamatarong mosidlak sama sa Adlaw sa gingharian sa ilang Amahan—Mal. 4:2; Luc. 1:78-79; Mat. 13:43.